

贛州府志卷十三

建置志

壇祀

廟祀

贛州府壇祀

社稷壇在府西津門外北向明洪武三年庚戌知府鄒奕
建景泰五年甲戌知縣邵昕修嘉靖初知府羅輅重修
廣二丈五尺袤亦如之高四尺東西南各三丈繚以垣
北十有五丈立石主於壇南正東出土二尺五寸別為
木主左府社神右府稷神有神庫神厨宰牲養牲所齋
宿房歲以春秋上戊日致祭

風雲雷雨山川壇在鎮南門外南向知府鄒奕建知縣邵
昕修知府羅輅重修木主餘制與社稷壇同歲以春秋

贛州府志

卷十三

壇祀

仲月上巳日致祭

先農壇在東門外 國朝雍正四年丙午建

按壇制凡壇基藉田神倉祭器以及耕牛農器俱動
用正項錢糧置備神倉內屋三間中奉神位東貯農
器西貯藉穀乾隆九年甲子福建按察使王廷諍條
奏巡行查勘有藉田遠隔不在壇前有將藉田米穀
雜貯並不敬貯神倉有並無牛隻農器者均經部議
定擬永昭慎重查贛郡向有藉田四畝九分在東坊
外神壇西側灌塘二口每年收租穀七石四斗三年
一次變價解司每年祭費支銷六兩

厲壇在府城北修建同社稷風雨山川壇壇有神厨更衣



房歲以季春清明孟秋望日孟冬朔日致祭先期迎城隍位於壇旁爲無祀鬼神受祭祭用羊豕果蔬羹飯寔衣等品

贛縣壇祀

社稷壇 風雲雷雨山川壇 先農壇 厲壇俱統祀於

府

里社壇一十七所 鄉厲壇二十七所

零都縣壇祀

社稷壇舊址在水南秘書坊後遷妙淨寺西明洪武三年庚戌知縣宋宏建壇制如前歲久圯成化間知縣高容重建

贛州府志

卷十三

壇祀

二

山川風雲雷雨壇舊址在邑西南明洪武三年庚戌知縣宋宏即其地創建宏治十年丁巳知縣高容重修先農壇在縣西郊福田寺外 國朝雍正四年丙午建壇制如前

厲壇在縣北二里知縣宋宏建後圯 國朝康熙四十五年丙戌知縣盧振先重建乾隆九年甲子知縣傅誠移建原壇左

里社壇一十七所一十三里各有之

信豐縣壇祀

社稷壇在城西禾豐門外里許文明山下明洪武十七年甲子知縣趙仕宏建

風雲雷雨山川壇在禾豐門外二里觀前地右明洪武十六年癸亥知縣趙仕宏建 國朝乾隆四年己未改建於北坊天一宮背地上

先農壇在水東坊樟木嶺祖教寺左 國朝雍正四年丙午建計農田四畝九分即在壇下每年早晚二次共收穀九石壇基係生員李捷達捐建

厲壇在水北坊長面嶺知縣趙仕宏建累石爲基長廣各丈餘

里社壇五所 鄉厲壇五所

興國縣壇祀

社稷壇距縣北里許瑤岡之陰明洪武七年甲寅知縣馮贛州府志
欽建成化十七年辛丑知縣章廷珪修作石壇門一座後圯 國朝康熙四十五年丙戌知縣張尚瑗重建邑人劉天真記

卷十三

壇祀

三

山川風雲雷雨壇在南岡明成化嘉靖間知縣章廷珪林恕相繼修後圯 國朝康熙四十五年丙戌知縣張尚瑗重建自爲記

先農壇在東嶽廟左雍正四年丙午知縣金履寬捐建厲壇舊在北郊二里黃泥坑明永樂間知縣江浩移建瑤岡嘉靖末知縣章廷珪以其地爲不宜知縣海瑞改建演武亭東今仍其地

會昌縣壇祀

社稷壇舊在縣治水西明嘉靖二十二年癸卯知縣沈桂
遷於第四橋萬歷間再遷於河北黃坊

風雲雷雨山川壇舊在縣治水西知縣沈桂改遷邑南駝
峯右萬歷間再遷河北黃坊

先農壇在縣南門外官塘 國朝雍正四年丙午建即以
官塘為耜田

厲壇在縣治西南水背

安遠縣壇祀

社稷壇在古田坊大興寺後北向明洪武七年甲寅縣丞
樊思明移建寺前宏治六年癸丑知縣甘文紹遷今地
國朝乾隆十一年丙寅知縣何蘭修葺知縣吳卜相建宰

贛州府志

卷十三

壇祀

四

牲房今圯

風雲雷雨山川壇原在修田坊距縣五里明洪武七年甲
寅縣丞樊思明徙永安坊正統十年乙丑知縣鄭炤遷
濂江坊嘉靖中知縣甘文紹重修 國朝乾隆十一年
丙寅知縣何蘭修葺知縣吳卜相建宰牲房今圯
先農壇在濂江坊靈寶觀右 國朝雍正四年丙午知縣
閻紱置耜田應祭詳賦役

厲壇在古田坊大興寺後南向縣丞樊思明建知縣甘文
紹修嘉靖四十三年甲子知縣李多祚遷社稷壇下
里社壇 鄉厲壇各鄉俱立

龍南縣壇祀

社稷壇在縣治南門城外明洪武初建舊有神厨三間今廢

風雲雷雨山川壇在縣治南門外制度與社稷壇同

先農壇在坊內堡楊坊玉石巖前雍正四年丙午建耜田

四畝九分知縣藥瑜捐置田七坵計租九石俱在農壇前後

厲壇在縣治西門外北一里

鄉厲壇二一在縣南一百四十里一在太平西水堡

長寧縣壇祀

社稷壇舊在城北一里今改在城南一里東北向

風雲雷雨山川壇在城南二里制與社稷同二壇俱萬歷

贛州府志

卷十三

壇祀

五

三年乙亥知縣沈文淵建

先農壇在陽和門外河東 國朝雍正二年甲辰知縣蔡

賓興創立

厲壇在城北一里

定南廳壇祀

社稷壇在廳西郊明隆慶三年己巳建

風雲雷雨山川壇在廳南郊建同社稷

先農壇在下歷城南郊龍頸岡雍正四年丙午建置耜田

四畝九分

厲壇在廳北郊建同前社稷

贛州府廟祀

關帝廟舊在今縣學址明崇正間改遷縣學右舊志沿前稱載漢壽亭侯廟 國朝順治六年己丑贛南鎮標中營副總兵楊遇明倡文武官弁捐資修葺薊州諸生朱衣記乾隆二十四年己卯知府朱宸重修

朱衣記畧云虔城內雖列刹相望而梵宮之外其匡扶世運覆庇蒼生者惟關帝廟爲最詢其創立所自始今之縣學是其故址也明季崇正年間卜遷於此其建於何時修自何人茫不可考值丙戌歲遭兵火之亂殿宇傾圮墻壁崩壞廊廡疎漏幾至廢棄楊公見而心惻因發愿修建時撫鎮道暨營協咸樂爲襄助各分廩捐錫度材鳩工甫一載而告成廟成之日屬記於生戊子年

贛州府志

卷十三

府廟祀

六

值江廣之變楊公藉神默告屢殲逆賊上功盟府故修廟之費視衆差鉅

按順治九年壬辰

勅封

關帝爲忠義神武關聖大帝雍正三年乙巳三代

俱封公爵祀後殿五年丁未照 文廟例春秋二祭

乾隆三十三年戊子易謚神勇加封忠義神武靈佑

關聖大帝廟門稱號應易今額又按府城 關帝廟

有五皆係公建公修 一在曹老巷初建無考相傳

前縣學右關帝廟坍塌每歲春秋二祭文武官於此

行禮 一在南門外教場右明萬歷三十三年乙未

贛撫謝杰建 國朝康熙六十年辛丑山東馬良燦

重修 一在新開路初建無攷 一在西津門副城
內初建無攷乾隆元年丙辰燬四年己未吉南贛道
青阿立重修三十六年辛卯吉南贛寧道覺羅永貴
重修

城隍廟舊在府治右明嘉靖四十五年丙寅知府黃宸遷
於縣學左前堂後寢左右廊廡列十二邑城隍位前爲
重門爲枋俱如舊制 國朝順治八年辛卯贛南鎮標
中營副總兵楊遇明倡文武官弁捐資修葺毛會建記
康熙四十一年壬午知府謝錫袞修歲以春秋仲月上
己日合祭於山川壇乾隆八年癸亥知府汪宏禧重修
自爲記二十四年己卯知府朱宸三十四年己丑知府

贛州府志

卷十三

府廟祀

七

李枝昌先後捐修

毛記云贛爲古虔州地北枕楚豫南控閩粵大江之上
一都會也故以一郡安危係數省之安危而其轉危爲
安者匪獨人力實藉神功則郡城隍當之矣今聚都人
士而尸祝之者不過曰奉天靈爽陰隲下民寒暑以節
豐稔有年民無夭札物無疵癘而已孰知其尸扶而嘿
相者在百萬生靈死生呼吸之間嶺海半壁得失須臾
之介乎余即以虔之近事言之金王逆節於西江李逆
反戈於南海帶甲如雲連州跨境東南之區盡爲震動
望風而靡惟虔一郡屹然中峙爲狂瀾砥柱故金李二
逆聚謀合力窺取虔一郡先後大兵壓境凡數十萬歷

數月所而虔以空虛之國寡弱之兵閉關受敵勢若壘
卵寢岌岌矣一自我兵誓師決策告諸城隍矢之天日
願以一死報社稷旋乃堅壁清野出奇制勝或一鼓而
挫其鋒或百戰而陷其陣歿濟而河伯獻靈縱火而風
伯效順以致神兵電掃克黨米消哮囁之衆一朝殲滅
不獨虔之一郡賴以安全而東南數省亦遂底定無尺
寸之失夫以寡敵衆以弱勝強百萬生靈爭於俄頃嶺
海半壁鞏若金湯人力不至於此然則虔一郡之城隍
其所陰扶而嘿相者豈獨在區區風雨順時民物安阜
而已哉乃自鼎革之際風火連遭廟宇傾圮巍巍神像
亦仆於地都人士若罔聞知一二布金鏤玉者亦未過

而問焉原副府今沅鎮楊公德威兼擅身作干城觀此
哀鴻初集而思向之肆力疆場者強半倚之神功於是
發心重建捐資爲倡制府劉公鎮府胡公文武諸寮凡
蒞茲土者無弗捐清俸以玉成之自辛卯冬十一月經
始至壬辰春三月告竣棟宇焜煌威靈赫濯對越之下
凜然惕然而後乃知虔之人不忘神之力而神亦愈有
以相夫虔也上鞏輿圖下錫庶類神所憑依豈有異乎
是爲記 汪記云古者爲民祈福請命外神之廟設焉
旱澇災侵神之咎也匱神乏祀壇廟不修靈無以妥虔
無以揭則有司之過郊南神祇壇風雲雷雨境內山川
合城隍之神祀於仲春上戊而城隍復有崇廟逆時雨

寧水旱再災兵遠旱疾陰庇民生職與吏同故祈禱禳
災胥於是乎在虔治城隍神聰明正直一切祈禱凡關
民瘼者如響斯應蓋其棲托之地精英翕聚旺氣特鍾
而更薦以馨香將以儼恪用能惠保我蒸黎也按志載
舊廟在府治右明嘉靖間遷改萬壽宮左康熙壬午郡
守謝公錫袞重修距今四十餘年予奉

簡命來守是邦月行小祭禮目擊棟宇漸就毀剝門墻楹
廡日以坍塌矢志修葺亟圖資聚計克公之項約有百
金可以經始而數不敷爰與司馬葉公瑄文暨諸寮友
商捐俸廉廣爲勸諭各紳士歡欣踴躍次第開工惟月
若日以甌以甃以城以墉覆蓋比密圻墁輝炳而制度

贛州府志

卷十三

府廟祀

九

一新夫神之有壇廟靈爽實式憑焉當其敝也作而新
之而明威益著昌黎云治人以明事神以誠不懈益虔
和氣召焉庶幾哉民之蕃釐如盼蠻之騰聚云工既竣
泐其事於石捐助姓名例得並書

火神廟在三官殿左明天啟六年丙寅巡撫南贛都御史
傅振商建並記 國朝順治九年壬辰南贛巡撫劉武
元重修有記

傳記畧云余以乙丑季秋蒞撫虔南蘄和洽神人以奠
有寧宇未浹旬而東建春門市里告災維時商賈輻輳
廬貨俱燼未幾而濂溪祠西又警郡人大恐於是闔郡
紳士咸議禳救且告余曰郡舊苦回祿以東山亦象火

厭勝者植松蔽其楮形又於府治前作天一閣遙鎮之
治後建真武廟義取以水制火俾弗爲厲歷年久樵採
者空山樹而楮形復現天一閣又圯於火真武廟又北
向弗克制故炎炎之勢日煽誠於三者速加意焉庶幾
其熄燭乎余思所以杜災之方謀未就而災及虔臺後
之曾氏居火光燭天署中夜亦如晝命諸役撲滅詢火
帝廟在何處將躬詣祈禱焉咸曰廟失所僅有義民蕭
貴塑火神像於玉帝宮廡中而寓焉余喟然曰火帝爲
正神而缺廟祀氣久鬱而不達其致火有繇矣宦是者
宜有達鬱之政以安神康民爰與觀察周君以謙少叅
洪君纖若促郡守朱君諭邱令卜地建廟屢視弗吉適

庠生徐開泰習業於玉皇樓左來告以蔬圃隙地相傳
爲火神廟舊址地勢爽塏風煙茂美不知圯自何年宜
復是土聞其言衆意咸愜遂於十二月二十八日祭告
而定基焉是夜郡民見有流火壯如鴻雁羣飛越城外
已而火警果息因急庀材鳩工命義民方國丞龍紹洙
日課其成爲正殿三楹周以儀門翼翼如也又以餘材
作室三間於東西隙地以居廟祝自次年四月初四日
經始於七月十四日記用度省而結構固蓋其慎也落
成之日祇迎前像而享祀焉爰紀始末以垂永久
劉記畧云贛州雙江五嶺城峻濠深礪山帶河之險自
昔記之戊子春金玉二逆狡然窺疆頓兵城下綿亘凡

數十里攻圍凡數閱月糧道斷絕火藥不繼米石值數十金雖有鳴劍抵掌之雄決勝圍內之策而財匱士靡岌岌乎不可支矣余於此時固不若睢陽之掘鼠羅雀但能嚴飭軍旅整脩火器以作固圍之計而終不能使狂寇北走也一日偶過東城火神廟憇息其中仰觀寶像巍巍明威赫赫有奮怒之狀余遂虔誠叩禱誓師出戰凡數日夜而羣醜望風而靡藉非神靈默庇烏能扼吭如是耶夫助國佑民神固宜爾報功崇德人實難忘余故捐資復裝金容重新廟貌功竣愿完爰作文勒石以志神靈

龍王廟在棉布街乾隆二十五年庚辰五月燬是年秋知

贛州府志

卷十三

府廟祀

十一

府朱宸重建

馬王廟在棉布街乾隆二十五年庚辰燬是年十一月總鎮王綏重建

開平忠武王廟在府治南鎮府旁明初常遇春克贛不戮一人詔許廟祀知府陳璧建總鎮王綏重修自爲記記云鎮署東偏爲射圃圃後爲射堂堂之後有開平常王像按王爲前明開國翊運元臣與中山岐陽東甌諸王從祀明祖廟庭列於世享蓋所謂有功而祀之者也然其廟於贛也何居贛人曰我何知王之功我知王之德而已王嘗以銳師破僞漢遂分兵徇贛地全其城不戮一人而去贛之有人王生之也嗚呼王之愛贛可謂

深矣史傳王矯武多氣決其格戰之勲亦倍於方面世
因疑王攻畧所至多所傷暴而孰知王之深仁厚德如
此予嘗論爲將之道其氣不可不勇而其心不可不仁
古之名將未有不勇與仁合以成其偉烈者也王之祀
此非獨慰贛人之心其亦爲將者之法歟書曰若射之
有志舍王其誰志哉予曩者軍諮江左時嘗識王葬處
又嘗泛舟采石弔王奪槩先登之蹟慨然想慕其爲人
今來鎮是邦而署適有王像予烏能無羨於王哉因命
工亟新王像而誌其所以重王者如此

趙清獻祠在舊府治宣明樓右祀宋知軍趙抃祀濂溪
周子寶祐中周子移祀於學知軍陳宗禮改建趙公祠
於城東咸淳六年庚午知軍李雷應重修文天祥記明
成化十九年癸卯同知王廷珪重修劉鴻記

文記云郡所在祠先賢之爲守者守得祠以遺愛然而
百世之下君子之澤有存焉者寡矣而聞其風爲之興
起尸而祝之不謀同辭識者於是上下世道而觀其大
節焉故叅知政事贈太子少師清獻趙公抃歷事仁宗
英宗神宗以忠亮純直爲時名臣公嘗治虔治益治杭
治越其政本之以清淡行之以簡易寬不爲弛嚴不爲
殘使在漢氏課功第能當不在循吏下抑公所謂大過
人者不寧惟是當王安石變更祖宗法海內騷動廷臣
唯諾趨走莫敢後先獨與司馬文正光范文忠鎮唐質

肅介額額爭論不少假借至上疏言財利於事爲輕民
心得失爲重不罷青苗使者非宗社之福公卒去位小
人相繼用事濁亂天經蕨芽禍根荆舒之罪穢污簡冊
如有一个臣斷斷兮無他技中原遺老炳然元龜天下
後世感憤追想猶凜凜有生氣嗚呼此真所謂大節關
係於世道治亂升降而不可誣也咸淳六年知贛州大
宗丞李侯雷應以公嘗爲是邦始至訪公祠所在郡治
故有祠與濂溪並自濂溪移祀於學前守陳公宗禮始
建公廟於城之東偏歲時妥侑習爲故常屋敝且壓神
不顧享侯慨然曰是不可憚改會歲豐人和廷無徵發
於是棟楹欄檻之腐敗撓折者斲斲丹雘之疎漏漶漫

者神位祭器之缺少不如禮者所費節約一日新美又
更爲之門俯臨大衢非徒侈觀使過者恭敬焉明年夏
五月落成侯時已除湘南刑獄使者將行走書屬某記
之某惟吏道苟且逐末忘本久矣侯之先公忠清有風
裁於世侯得之見聞獨能尊事文獻景行先哲風示邦
人以繹教思其淵源有自來哉清獻距今二百餘年贛
石公所鑿也章貢臺公所創也公之事遠矣而其山川
猶有衣被其餘贛人思之曰公生而德澤在吾土公之
賜也公死而典型在吾土公之賜也嗚呼公之在熙寧
也當時小人號爲得志富貴漸盡終歸無有贛何地也
而公祠在焉後公而爲贛者相望豈無可以繫去思者

而公之祠巋然靈光何其懿也嗚呼士大夫之於當世
其大節可不謹哉可不謹哉 劉記云贛古虔州也據
江西上游沃野千里山川城郭之勝雄於嶺北唐宋來
類多名宦遺愛弗諼嘉祐中趙清獻公知郡草姦敷和
疏鑿水道弔恤鰥孤善不殫紀周茂叔先生時爲通判
握手同寅邦績用熙而河南程氏兩夫子者因從之遊
名賢過化風流餘韻赫赫如昨日事國朝洪武中聿新
郡治爲堂其北以休寮案榜曰清獻示景行也直南百
步爲後堂於儀門左則又合清獻周程而以三賢名歲
久風雨震凌危不可宇前此所司方圖之而未即緒成
化癸卯適郴陽王侯廷珪以奉議大夫來領茲郡至則
剔蠹刮訛興陋補弊民瘼而起吏矇而瞭顧瞻茲堂昕
夕中惕喟然嘆曰趙清獻之功德在民心其未泯乎何
至是也廼荒廼葺爰舉是役需出公帑之奇力出召募
之徒工出四方之傭不競不弛籌畫咸自已出而加工
於三賢者倍焉不數月始考郡人罔聞知士大夫舉賀
者纔二三又閱月始羣謁焉皆曰王侯不動聲色而舉
大役如此爲之歌曰赫赫清獻王侯光之翼翼三賢王
侯張之有崇其堂王侯荒之民力志之甘棠詠思曷其
諼之請勒石詔示方來侯固拒再四乃以記俾予嗚呼
清獻距國初三百餘年而堂以名又百有餘年乃重作
於侯天時人事宜若有待焉者夫以清獻在當時英風

凜節轟赫朝野天歛大惠庇於此邦虔之民何其多福也無已而周程又歷焉陶薰鎔冶至於今日虔之民何其多福也繼諸賢而蒞茲土者又多惻怛愷悌之政若侯其最後者景仰清獻之賢如此豐功偉烈如此福德在民又如此繼侯來者不有慕其為人如今日者乎斯民之受福抑又無窮矣登茲堂而有感高山仰止世得清獻而治之虔民其世爲清獻之民哉

清忠祠在郡城門西祀宋知軍趙清獻抃文信國天祥明嘉靖九年庚寅都御史周用修趙公祠而並祀之改題今名自爲記後知府羅輅移建舊府治外燬於兵基被民佔 國朝康熙四十一年壬午知府謝錫袞將鴛鴦

贛州府志

卷十三

府廟祀

十五

橋贛院陸問禮祠清出改祀清獻雍正五年丁未貢生蕭元相等呈請贛南道王世繩仍合祀文信國以陸謝二公配祀後復燬乾隆四十三年戊戌知府竇忻知縣衛謀改建考院左同知舊署內自爲記

周記云贛祀趙清獻文信國以二公嘗知是郡故也嘉靖八年子奉命視師南贛諸郡間謁二公祠在郡門之西子謂其官屬曰二公生而仕於此南向以臨民沒而祠之以東向於義則未安棲公之神復不於堂而於寢於禮則未協盍圖之明年而改祠正位子曰祠其人既謀於禮而不悖則宜著其治行勤勞者以附於祭法人之言曰清獻之清信國之忠古今之所謂清與忠者也

則亦不可幾而及也是則然矣不曰贛之爲郡自漢
於今千幾百年郡之有長自晉太康以後其事業顛末
不可攷見與僅存名氏而未有稱述蓋亦多矣其間風
槩氣節差可比擬者可直謂之無人哉夫臣之事君不
易其介之謂清不有其身之謂忠二者非性成則必遷
非勇克則無所於終此二公所以不可及者人之秉彝
好是懿德則不獨二公爲然矣故嘗求之二公其言曰
晝之所爲夜必告於天不敢告者不敢爲也其曰樂人
之樂者憂人之憂食人之食者死人之事又曰義勝者
謀立人衆者功濟故清獻再知蜀郡不作神羞簡於天
子動容稱歎力爭新法而終於外補信國蒙大難而囚

贛州府志

卷十三

府廟祀

十六

於燕市足不履所居樓下地者三年其篤信力行類如
此是故不以辱加寵不以退榮進不以利妨義不以死
易生志遂於當時烈垂於後世光明俊偉立乎萬物之
表使人咨嗟歎息以爲不可及此豈偶然而得之者哉
或謂清獻當宋治平去慶歷嘉祐爲不遠則宜受知於
英宗信國於德祐景炎之間大事已去繼之以死可也
夫君子於時有遇不遇故於事有幸不幸時與事在我
者也在我者處之得其道焉耳即使二公不遇於宋終
身一介之夫與遇於宋而與六卿百執事雍容周旋行
其所無事其能使之泯然無所成就而與衆人等哉予
既懼夫人之不肯篤信力行而徒諉於所遇之幸不幸

而卒無以善其道又深懼夫人之處於幸不幸之間顧望中立而無以自振也故因二公僭爲是說以詔自今之吏於贛者知所尊信俾贛之人世蒙其休澤以永其思焉 竇記云清忠祠之始建也基在城西久廢後以鴛鴦橋陸公祠改建又踰七十餘年亦不可清復志載趙公祠文信國公爲記蓋宋時已有之明乃並祀文信國公閱幾興廢丙申歲余蒞是邦偶往其地見祠宇頽廢基址湫狹迺與贛令衛君商就考院旁同知舊署修建改立匪獨隆祀事之文將以標示官方效法先正俯慰衆望以上報

聖天子慎重親民之官至意不可無以紀歲月也按二公

勲業史冊已具趙公爲政於郡志傳及各祠記特詳之文山知贛州軍遭宋季世戎馬倥傯未暇有所作爲而起義勤王一舉則與贛相終始事雖不濟而心已盡矣二公之謚一曰清獻一曰文忠故明都御史周公用題曰清忠祠昔夫子許陳文子以清令尹子文以忠而皆不予以仁仁全德也任重道遠非宏毅者不足以勝任即以聖人之門惟顏子能三月不違其餘日月至焉爾已若清與忠因事見端文子子文皆足以當之然則二公之清忠將概不足於仁乎周公用之記曰不易其介之謂清不有其身之謂忠固也第清以澄心而寡欲忠以盡已而不欺由寡欲以至無欲由不欺以至無欺而

仁亦在其中矣余不敢謂二公之純乎仁觀其事事可告於天念念不忘乎宋宏而且毅殊途同歸其庶幾乎欲仁而得仁殺身取義以成仁者歟夫二公在宋雖不甚得行其志而趙公治郡隨所至而皆效虔州尤其著焉者文山僅一試於郡而倡義勤王郡中豪傑爭起而應之非其清忠之所本有進於仁不可以若是其幾也後之爲政者誠能於二公推見至隱爲之本隱以之顯焉經權常變之間可無所措而不宜於從政乎何有哉謹書二公有合於祀典之大尚論其所以清與忠者以昭示來許而刻諸石

精忠祠在府城南景德寺右祀岳忠武飛有飛手書贈張

贛州府志

卷十三

府廟祀

十八

紫巖北伐詩碑久廢明嘉靖七年戊子知府王世安都御史汪鋐請於朝即故址重建額曰精忠錢宏記二十五年丙午都御史顧遂重刻詩碑萬歷四十六年戊午都御史錢桓修國朝康熙九年庚戌都督同知姚自強修自爲記三十五年丙子後營左都督李生桂修督理贛關楊昶記五十年辛卯知縣楊玠修雍正八年庚戌吉南贛道王世繩修乾隆三年戊午知縣張照乘撥田租爲修葺費

錢記云宋太尉岳武穆王有祠在虔景德寺之西蓋虔人感其德繪像祀之歲久毀莫爲之舉嘉靖戊子大中丞蓉東汪公首舉其事得其故址遂請於朝而創設俾

祠宇煥然改觀固所以表王不世之功抑有以繫虔人
不忘王之澤也其秉彝好德良心曠百世相感者歟夫
古之立國救亂誅暴曷嘗不用兵哉是故德莫大夫仁
義也懷民以德謂之仁不服而征謂之義用兵而仁義
寓焉者湯武是也昔成湯征西誥曰有夏多罪天命殛
之曰徯我后后來其蘇武王東征訓曰取彼凶殘曰綏
厥士女殛之者義也取殘者亦義也蘇之者仁也綏之
者亦仁也先儒稱三代乃仁義之師三代之師若時兩
者信不誣也有宋紹興二年虔吉彭友反連兵寇掠循
梅廣惠英韶南建邵汀諸州高宗專命飛平之飛至虔
彭友率衆迎戰飛擒之餘黨降初以隆祐太后震驚之

故密令屠虔城飛請誅首惡者義也宥脅者仁也所全
活甚衆豈非即三代仁義之師者乎抑非即三代之兵
若時兩者乎是以虔人思之相與繪像建祠報其仁義
之德於無窮也仁矣哉武穆之心也使高宗移任秦檜
者而任武穆恢復中原如拾芥耳豈止偏安江左已哉
奈何天不祚宋使高宗信用姦檜殘害精忠是高宗有
負於武穆也武穆何負於宋乎武穆雖死而忠心義氣
凜凜與日月争光雖死猶生矣若夫成功則天也豈可
以一時利害計哉予奉命提督是方謁王之祠憫王有
恢復之志而不能成其終也可慨也夫 姚記畧云南
渡時有哲宗之後避難至贛衛行者皆張刃列戟適寇

楊么之亂時方戒嚴贛人聚子弟登陴謂孟太后遠在北方何以至此得毋非楊么謀納其內間乎露刃詰之執其從者賴二三老成人持之事遂寢後孟后北旋窮其事議遣兵高宗命武穆岳王帥師以行手詔屠城毋賞王行次廉得其實飛章白之至之日勒兵待命果得請原免止逮首事者正法夫贛之生齒不下數十萬假使王當日利子女玉帛不復詳察卽察之或惕於利害不爲辯白丐命則薰蕕膏於斧鑕稂莠盡於刀俎二水之間寧有遺黎也哉顧王以精明濟其仁愛宜贛人之德之而廟祀勿替也廟創自南宋歷元明遞擴而大凡地方旱澇疾苦虔禱多應王當日以活民爲心終將以

福民爲念俎豆弗衰固其德之在天壤者不朽也庚戌將乘傳南歸後營吳遊戎以軍務從事樽俎間備述其居隣廟左目擊動念請葺而新之予曰王不以身家利害易一城之生靈是不可不新其廟貌以爲愛民好生者勸時藉文武紳衿兵民各隨意樂捐以勦事閱二月落成捐助姓名併附鐫石 楊記畧云宋高宗時岳忠武討平彭友諸羣賊於虔州高宗以隆祐太后震驚之故密令屠虔忠武因請惟誅首惡虔人感其德爲祠立像而祀之忠武之歸也高宗製旗手書精忠二字以賜虔人因名其祠曰精忠史稱忠武事親孝與人忠好賢下士雖羽書倥偬中從容覽經史恂恂如書生結髮從

征伐經數百戰未嘗或敗朝廷論功則必曰將士之力
其功烈又豈獨在虔人哉魯國李公以都督來佐鎮茲
土距忠武五百七十有餘歲一日過精忠祠見其傾圮
蕪穢遺像剝蝕風雨中心焉傷之於是竭力庀材鳩工
又以告於同官諸君子相與共勦其成不數月而祠宇
輝煌遺像赫奕見者無不肅然起敬起感時予出權贛
闕親見其盛因嘆忠武大義凜然與日月爭光而都督
公同德相感於曠世之下毅然與同人共爲修葺使祀
典廢而復興此其意甚深遠矣祠成屬余記余乃以其
中之不能已於言者紀而饒於石

楊陸榮詩云敗壁蒙塵黃古砌繡苔紫招尋詰遊步秋

贛州府志

卷十三

府廟祀

二

花爛堦祀當年忠武王提戈靖不軌渠魁誠莫遁全城
無死理馳封臣慮切得請君恩邇廟貌此日存千秋肅
時祀爲問靈旗歸故國竟誰是可憐趙家土莽戎幾伏
起留遺認故物河水波瀾瀾 孟惟清詩云信有精忠
在荒林夕照時一杯清酒酌三疏郡人思不殺留生氣
成仁拜古祠斷碑遺墨老心折北征詩

東坡澹菴祠在光孝寺左祀宋端明殿學士蘇軾秘書郎
楊方今廢基入寺內

濂溪祠舊在貢水東祀周子配二程子繼遷鬱孤臺明嘉
靖十年辛卯所司協修羅欽順記崇正間知贛縣陳履
忠移於光孝寺左廉泉側今併入濂溪書院

羅記云自孟子沒而聖學不傳異端競起欲觀妙者率宗老子求見性者必歸佛氏佛老之說日熾而吾聖人之道益以不明千數百年之間鴻儒碩士慨然欲自任以興起斯文者蓋有之矣然於真知實踐猶或有歉故其效終亦未著數窮理極而後濂溪周子出焉不由師傳默契道體殆天意之所屬也河南兩程子早嘗親受其教深造自得益從而光大之三夫子之盛德睟容見者起敬格言至論聞者傾心自其教盛行天下之士始不迷於所向知聖人之道實本於天命之大公佛老之說皆蔽於一己之私見惟致力於下學而上達之妙初不外此誠明兩進敬義兼立則師道之在我者將無遠

於聖人舉而措之天下之民三代之治可復蓋三夫子之所爲教其體用之全有如是者故至於今而學者莫不宗之雖有異端莫能入也由是觀之三夫子功在聖門誠足以比隆孟子而施諸罔極豈曰小補之哉周子嘗通判虔州事即今贛州府也贛故有祠以祀周子以兩程子配焉蓋名宦之蹟固不容泯而傳道之功所繫尤大舉之者其有見矣祠再遷在鬱孤臺下嘉靖辛卯都御史會稽陶公奉提督軍務之命而來祇謁如禮既乃達觀其制則猶以爲未備也兵備副使劉君退自陪位遂諭公意於羣有司於是同知喬遷通判陳琦推官陸府協謀以趨事踰月遂底完美公所統郡聯絡四省

習俗不齊惟德化是先不專畜威武劉君亦惟敬惟忌以舉其職蓋皆遵用三夫子之道者也尊其道則於其祠事也宜在所謹而風勵後學之意亦於是乎在將來豈無感發而興起焉者乎公間以書授訓導顏澤使來請記欽順淺陋不足以知三夫子而公命弗獲辭也敬爲之書

程大中祠在府學右宋紹定六年癸巳知軍姚鏞建肖像以祀

路公祠在府南祀唐江西都團練使路嗣恭顏文忠真卿有記

按寰宇記云唐大歷九年嶺南將哥舒晃反嗣後統

贛州府志

卷十三

府廟祀

二三

五嶺兵討斬之師之所處民不疲勞爲置生祠以顯遺愛

羅念菴祠在城東鳳凰臺祀羅洪先以講學之地改建

王文成公祠始建鬱孤臺側繼遷府治東南軍器局左後

都御史陸穩遷府學並建公祠於府學右明萬歷間贛撫秦耀大叅徐用檢重新之張位有記並額以聖諦先知

國朝康熙九年壬寅都御史蘇宏祖改建於崇聖

祠前有石刻像贊乾隆十六年辛未知府姚文光修初祠由學宮進二十一年丙子巡撫胡寶瑤燬知府柏超重修另開門於學宮外超自爲記

張記云虔州王文成公祠舊創鬱孤臺後徙建軍器局

之左萬歷己卯當國者奏毀天下書院是祠因廢幸賴天子明聖尋詔復書院諸祠大中丞秦公出鎮虔臺與大叅徐公議葺新之踰年畢工規制宏麗廟貌如故士民仰瞻靡不欣喜中丞乃走書屬於余余惟文成公鴻勳正學文武爲憲昭代名臣罕儷顧其功在江右最茂迄今父老能誦之學在江右最著迄今縉紳先生尚習而傳之虔州尤公息馬論道過化最久之地精神注焉君子曰是役也寧惟風教所關仰承上意崇報先賢慰荅民心一舉而數善備矣余昔濫竽石渠習先朝故事見嘉靖初議公封爵併其學排之不勝沮尼報罷隆慶間公功始明而頒爵之典方定萬歷間公學始明而從

祀之議方成蓋初而疑既而疑信半又既而翕然歸於一甚哉事久論定之不易也竊謂公功之鉅而顯者毋若擒叛王公學之自信而揭以傳授者毋若致良知當武廟末年國儲未建人情洶洶叛王冒賢民稱義兵且恃貂豎內援中外觀望公奮不顧禍名之爲賊與之抗而卒殲其師是在倡之之難聖學榛蕪世儒溺訓詁詞章之習不則硜硜自守又墮形器而昧本源買櫝還珠刻舟求劍儒幾腐矣公獨高視千古超見妙悟排衆論而標聖宗至今東南半壁天下人興反本之思亦在倡之之難也嗟乎媿阿利便首鼠保軀拘泥見聞者率沉淪固蔽莫能自拔天生豪傑超而振之功大冒謗識高

負非固其宜矣顧公平生之志無非孔氏家法者孔子曰知及之仁不能守之又曰可與立未可與權是必力行方始近仁而權非聖人不能用也夫以上聖之資三十而立至五十知天七十從心而不踰矩顏曾親受其傳曰勿三省兢兢請事師說未敢輒談天而及化聖門之重於真教固如此夫所貴於權者不離經也貴於悟者不離修也是以繩墨有不必拘而終不可踰功力有不必用而終不可放夫何趨權變者拂經常薄慎修而捷徑於頓悟遂執伊尹之就桀病伯夷之耻周右陸氏德性之尊左朱子學問之道決防裂幅競影逐聲由是說鈴繁而欺德日多矣規矩穀率僅羿所不能外也彼

泥馬而莫得於意紛紛賤工有師匠者出示之曰是在巧悟何如奚必盡泥聞者不察遂併廢規矩穀率不用夫非師匠意也始也公病天下之拘攣舊見不憚出身而振其類詎知論議日新貿貿焉莫知所之天下更爲公病抑豈公設教初意哉今欲私淑之士無倍於公指將奈何曰聖人之行不同學無二也亦惟外潔內貞而已潔則無行不與貞則積久自明迹公少用擊奸投荒萬里困衡大覺生平嶮然利祿不入於心所謂潔與貞者非耶是方能用權而悟皆實際善學者何莫舍是而從事於斯也余生也晚未及遊公門又膚陋廢學胡能窺大道一斑漫然就正用復大中丞問記之意遂不自

知其僭踰焉必如是而舉之天下後世誦公者斯無遺論矣秦公名燿無錫人靖寇綏氓克媿前烈徐公名用檢蘭谿人蓋素講良知之學而有得者 柏記云明新建伯王文成公守仁巡撫贛南時嘗殄桶岡三泐橫水諸積寇又建書院於貢水東與諸生講學二郡士民被其澤服其教作祠以報其功德至於今不衰乾隆二十一年秋余奉 命來守虔州下車之日進謁公祠慨然慕公之爲人夫文事之與武備自漢以來兼之者恒不數人若漢之諸葛武侯宋之范文正文信國明之劉誠意于忠肅及公而已武侯信國未遂其志而功不竟誠意忠肅功足與公埒而講學則未之逮且不保其終文正

之時君明臣良內外一德其功與學雖與公近而公獨遇當其難公之秉鉞雙江也定謀帷幄談笑指揮掃數十年未靖之巢穴出數千餘里之赤子於水火而登之衽席功烈之卓卓虔之士民類能咏歌而颺縷之而獨其身在戎行從遊日衆講論不輟後人每疑致良知之說易啟學者禪寂之門不知良知本於孟子致知之目本於聖經經不曰致知先格物而曰致知在格物蓋格即致也知即知乎物之理也然則言致知而格物在其中矣後之人不思致字之義而摘良知二字以誣公不亦過乎且經濟者學問之所見端也學問淺則經濟小學問假則經濟虛學問雜則經濟不純稽公在贛之勲

業或用間或用竒當武宗之世權寺內擅逆藩外煽危
疑交迫而事卒克濟此其定識大力豈致虛守寂空疎
無用者所能爲哉公少時穎悟絕倫讀書過目成誦迨
後豁然貫通遂以致良知示人蓋公亦由下學而幾上
達故爲是洞見本原之論而非拋棄一切之謂也公祠
在郡學之側前大中丞胡公以三不朽顏其額而與前
觀察徐公謀重新之余適承乏是邦爰暨各邑諸君倡
捐庀材鳩工於年月日落成因爲之記見公之所以不
朽者非惟功德之獨隆抑亦學術之純也其俎豆於贛
當與岳武穆周元公鼎峙千古也夫

國朝王士正謁王文成公祠詩云新建當年此誓師森

贛州府志

卷十三

府廟祀

二七

然松柏見靈祠軍聲不藉條侯壁籌策惟應漢相如千
古許孫同廟食一時張桂太傾危後來定論煩青史峴
首猶存墮淚碑 顧嗣立詩云文成擔師日一葦邈長
空談笑取吳淠安危仗郭公雙江沉殺氣八境紀神功
日暮蒼松下風雲護闕宮

報功祠在縣學右舊爲王陽明書院嘉靖間都御史陳察
改今祠嘉靖二十八年己酉都御史喻智以贛守邢珣
配享祭酒鄒守益記

記云報功祠者報先師陽明王公功也配享者舉三湖
邢侯珣以配公而與享之也公以功在宗社教在士類
澤在黎庶嘗立祠於濂溪祠嗣政者謂弗虔也徙於郡

邑學宮之右益偕同門俞尹大本祇謁遺像議隆報祀
會清江俞中丞蒞虔臺慨然圖續公之緒修厥廢墮以
秩祀典復念贊襄成功邢侯與有勞而祠弗及以詢於
士民士民協其議而林郡守功懋贊其決方憲副任覈
其實遂列祀名宦而設像以配於公之側仵來徵言山
房曰維公之學與邢侯之政皆司成氏所濡染也其昭
明貺以信於後益也有慨於中踰三十年矣往歲受學
於虔時方勦橫水破桶岡平泐頭郊野樂業商賈四集
而成人小子橫經講學歌詩習禮雖雖文物之盛暇日
以通家謁三湖於郡齋歷詢親冒矢石規畫章程象譽
歸重焉逆濠之變益復在軍門樟樹誓師西山搃伏豫

章復城黃石俘馘公扶疾冒暑鞠躬盡瘁攬群策以戡
巨憝而邢侯與松月伍侯赫然爲稱首吉兵將北侯麾
義勇陷陣遂斬賊帥以褫逆魄厥績尤偉焉功高謗興
羣憎交煽權奸勢閹朶頤封拜將陷公於不測而嗾以
焚掠爲同事罪聖主御極爵賞始及公而侯竟以叅藩
陟左轄致其事公辭爵力爭之至有虛受墜職實畀退
閒阻忠義而快讒嫉反不若觀望引避可以安享富貴
無衆口之誹誠不忍叨天功掠衆美獨受殊賞以醜顏
面聽者爲之汗背而竟無所濟未幾而公之爵亦褫矣
益嘗告執政曰死忠死孝自是臣子降衷豈以賞不賞
爲加損而國家礪世磨鈍亦使乘風雲附竹帛賞延於

世以爲鼓舞之具試評江西功次何似安化而賞罰黜
闇豪傑疑沮異時南征北伐奚以爲軍旅法程此事自
關國體非一一家恩澤計執事善其言而未改豈待時
而發耶肆茲中丞聞幽振鬱順物情以勸有功而監司
至於郡守縣令敦古舉義應若桴響克是操也秉鈞軸
幹化機別淑慝樹風聲罔俾黯闇疑沮以蔽懿德將式
克前休政欽成烈以聞於無窮其兆足權輿矣益不敏
尚執筆以俟

北川陸公祠在府學左都御史陸穩生祠也尚書張鰲記
國朝都御史劉武元都督胡有陞兵備道張鳳儀以
禦金王二寇全城功邑人俱設像其中祀之兩學諸生

贛州府志

卷十三

府廟祀

二十九

春秋有私祭原額名賢祠今爲四賢祠

繹梅謝公祠在府北玉虹塔前祀都御史謝杰郡人謝詔
記祠廢

李公祠基址無攷明萬歷間商民建祀通守李熠郡人謝
詔記今廢

記云贛東西權闖所從來久矣惟利權所在賦則易漕
利徑所趨羶則易聚外食爲蠶內食爲蛾是爲蠹賊其
爲權梗莫大焉梗之生也法所不能行法之敝也梗益
不可去權政安得不壞前大夫慮商人先事而詭有所
匿也於是偵邏四出訶其不然則有賂橐中之裝緘鑄
甚固必欲窮搜而採其底裡勢不免於狼籍則有賂駟

僧居間交通彌縫多其指目則又有賂鷲胥猾書洎門
隸輿臺環列其門搖手舉足便有輕重則又皆有賂一
之或闕指瑕索瘢敗端立見商安得不困商因而靡所
控告也惟有裏足再不敢入爾已公聞而慨然曰有是
哉自今以往其罷偵夫省按卒遠阻僧逆諸無賴惡少
夤緣爲奸利者無復近關諸在官者毋輕爲恫喝蹂踐
恣其攫噬胥吏奉行文書毋得濤張有所染指貨載舟
水載筏使商人自相占也匿不以占占不以實則有坐
併沒其貨夫希減而得沒亦何利之與有果其不忍欺
始無委諸費於谿壑而盡以輸公也既無宿滯又免後
艱利孰大焉令下商人欣欣喜色相告曰明府來其苗

贛州府志

卷十三

府廟祀

三十

黍之膏雨乎微獨陰雨去其蝨賊矣公勵精勤事而又
不欲竭澤而漁時時解網之目以寬畸人之負擔而覓
升斗者當春夏之交河水漲駛爭先渡者篙楫相觸善
溺人公爲立法櫛比鱗次若從枕席過積歲全活爲多
公嘗有事省會則商舟停泊於野次暫者或浹旬淹者
或浹月必俟公還不召而自來公何以得此於商人哉
要以習公之嚴而樂公之寬故其歸心若此公滿三年
攷三臺特疏請加五品服俸留任越六年有慶遠府丞
之擢已改德安遂去贛去贛二年而祠始構贛人談述
公徃事津津不容口至爲泣下比歲大浸杠梁圯斷間
溺人病涉者輒扼腕而嘆曰李明府而在蹇裳濡足者

絕跡矣即是而知公之德澤入人之深也非所謂沒世
不忘者哉是宜祠

即公祠二俱在棉布街一郡紳耆建一官司公建祀知府
郎永清吉水李元鼎記康熙四十四年己酉子郎廷極
巡撫江西親摹

御書世貞堂額懸之并跋五十年辛卯驛鹽道段志熙署
贛南道事倡郡寮捐俸購祠田并里民舊置田畝資修
祠費督學楊顥記後兩祠皆燬於火上祠基改建龍王
廟乾隆四十三年戊戌署贛南道湯萼棠知府實忻倡
郡寮捐俸修復正祠三楹外大門一間兩旁店房二間
收店租以供祭祀

贛州府志

卷十三

府廟祀

三一

郎跋云康熙乙酉春臣廷極於浙省恭扈
聖駕蒙

皇上親灑

宸翰追賜先臣祠宇取義隆重光寵存沒伏念先臣官職
所歷遺愛在人莫不建祠尸祝虔州乃出守之地距今
五十年矣廷極以第四子荷

皇上特簡鎮撫下車之日即訪知廟貌猶新郡人歲時奉
祀不稍怠因親摹

御筆璇題銀榜懸於祠之中堂以榮

君賜且令臣廷極亦得重自勉云

楊記云余昔待罪史館纂修

章皇帝實錄至 國家定鼎之初江西疊經兵燹而贛爲
尤甚未嘗不掩卷而嘆曰贛僉矣而今日者林林總總
依然東南一巨鎮不可謂非當時守土者之力也而莫
得其詳既而改官柱下以衡文至贛者再乃知丙戌丁
亥間守斯土者爲大中丞三韓定菴郎公贛人稱其德
政嘖嘖不去口因謁其祠瞻其遺像攷核其名迹而公
之爲治始得其詳焉蓋公循吏也亦能吏也其初至官
城郭邱墟流亡未集公身爲招復者數萬餘戶時王師
絡繹無虛日公則供億儲備各有方略而市肆不驚李
定國郝尚九之降卒白晝入民居索酒食或拉諸生擔
負公責以大義卒挫其威而監之出境贛民廖安民王

曰且爲仇家所誣縣已具獄公理而雪之他如繕城垣
修郡學復書院增科名息訟省耕禁差免役諸凡政令
無不綱舉目張乃因從子中丞開府江西以例避去贛
民攀轅號泣留之不得亦既配享學宮矣猶慮其久而
或廢士民方仲張興祚等復置祠田一百七石油山一
座供守祠僧課誦之需仲又置田二十石以供祭而贛
縣編載祭額則與諸名宦共享焉余然後知今日林林
總總之贛皆公勞徠休養起白骨而肉之於數十年之
前無怪乎贛人之愛公思公久而勿替至於如此之甚
也或者以公觀察於楚分藩於豫建牙於齊魯至於今
楚豫齊魯之民莫不俎豆之恐後又烏在區區一贛哉

余謂日月之在天本無偏照雨露之潤物不示私恩而六合九州之受其光澤者則若以爲日月雨露之偏私於已也夫公之德亦猶是已其治楚也治豫也治齊魯也一如其治贛無所偏與私也而贛之人若以爲獨偏與私於贛者猶之乎楚豫齊魯之人各自以爲獨偏與私於楚豫齊魯也則夫海內之士大夫不知公之治贛而余則就贛言贛而已矣既核其籍因載筆而爲之記佟公祠在湧金門內祀贛撫佟國器後因水患移建於排頭街並置祭田吏部左侍郎熊文舉記

記云碑以志不忘古者陵頽海竭而文或不泯則碑是

矣今我於虔撫大中丞滙白佟公蓋低徊重有感也

皇清開創大業直省俱設鎮撫一時鴻鉅奮揚功烈綏靖黎庶誠不乏人然亦有未諳政治突建纛牙事涉因循概浴幕府情多隱鬱分隔堂階芻蕘不詢鄙忽先民輿頌侈陳罔聞規瑱甚則一知半解猷畧自雄大害鉅奸煬叢不察一日遷喬輦金緘帛去烏隼飛揚耳樓船滿載耳轉瞬聲消響寂風雨淒迷誰爲不朽者即謂羊叔子峴山之淚爲龍藏蛟珠可也我虔佟公則不然公之德本於性天其道根於學問遭時不蚤感憤多端所師所友所見所聞皆忠孝名家風規希特忽遘雷雨經綸屏翰如取諸寄前此授鉞八閩值海水驚飛公料事機

先算無遺策

天子嘉之曰能長城是倚以一門督撫引避移鎮於虔閩則一隅虔轄四省公曰艱哉昔在戊巳潰亂此城雖峙民靡孑遺公之撫虔功德不可具述其最大者請折漕以裕餉而贛寧兩邑紆於飛輓別官民田土請免徵荒而開屯攘熟之弊則盡剔焉

王師駐贛秣芻糗吸脂膏公均勞屬郡贛汔小康長林密箐十餘年巨寇出没負嵎公審方畧勦撫合宜遺孽頓除聲教四被如力行鄉保以厚風俗加意學校以振人文浚築城池以嚴備禦禁差搜舶以柔遠來步禱立應至誠格乎神明朝奏夕聞精忠感乎堂陞幕府燕閒

贛州府志

卷十三

府廟祀

三四

輕裘緩帶襦旗畫偃說禮敦詩蓋公於虔不特撫之而且生之又顧復之嗣續之壽考之公今雖移鎮兩浙浙雖首藩又當山海之警蕩氛霽翳即不可無公而我虔赤子何以釋於襁褓奪其乳哺也無已其謀諸片石我輩猶得時而拂拭曰庶幾覩我公之衮衣而依我公之綦屨乎大夫長吏以不佞舉爲公所心許屬記於余余謹撫其概如此

朱公祠在新開路祀知府朱光圉

孔公祠在棉布街祀知府孔興訓

王公祠在萬壽宮右祀明贛撫王之良

贛縣廟祀

城隍廟在縣治左明正德十三年丙子知縣宋瑤建萬曆四十三年乙卯知縣楊汝昇撤而新之前殿後寢東西廊廡前爲頭門次儀門中爲池右隅別爲齋省堂郡人謝詔記 國朝康熙二十四年乙丑知縣劉瀚芳修葺乾隆二十七年壬午知縣沈均安集邑紳士重新之自爲記

記云古先王設官分職有封建之地即有所封之神故築城浚隍保障一方亦奉其職司之神以爲民主於是神所憑依享斯祀者隱然與守土牧民之令長相維繫蓋吏所以爲民興利除害顯移風化神亦所以爲民捍災禦患默相黎元此城隍之神所以例有崇祀也有明

定制詔天下郡邑於仲春上戊合風雲雷雨境內山川城隍諸神祀於南郊 國朝因之著爲令典而城隍仍建廟崇祀是禳災迓福惟神實有職司其以被民生安境內者澤至深且遠也贛邑城隍廟在縣署左與衙平列亦幽明并治之意也其規模營造歷有年代康熙乙丑邑令北海劉君從而修葺迄今又經數十載風侵日蝕漸不可支余朔望展禮每怛然心動第念神所以庇民民之露處猶惻然其不忍矧庇民之神而顧使其居頹敗之宇何以安神靈而崇廟貌且神之不安而民何賴以安乎爰集邑紳士謀新之住持僧照春持簿晝夜苦募勸捐都人士咸尚義助資不踰年而功已告成今

僧乞文勒石以示後來夫今之廟宇巍峩規模丕煥登其堂其神如在於以迓洪庥而邀寵貺非都人士之喜於急公而踴躍從事曷克臻此也抑亦神之德有以入人深而感人速也吾知誠感昭昭以之祝歲則時和年豐以之禱旱則霖雨週遍除疫癘則民無天札之傷禳天災則野無蔓延之苦他如邑有難事祈之無不應其爲民生利賴如是宜合邑之所虔恭而敬祀者豈與廣種福田乞靈於浮屠老子之宮者哉是爲記

江東廟即嘉濟廟舊在雷岡當貢水東故曰江東廟其神曰石固相傳贛人生於秦代沒而爲神漢兵擊南越神降於峯頂告以克期已而有功遂廟祀之唐大中時里

贛州府志

卷十三

贛縣廟祀

三十六

人周誠復建進士楊知新有記楊吳時薛光範亦有記俱無攷宋以來屢加封號咸淳六年庚午知軍李雷應重修文天祥記明洪武中勅有司歲以正月初八神誕日致祭後改祭春秋今移建城內四路口

文記云今天子咸淳六禩大宗丞權左侍郎官李雷應被旨知贛州贛地大而俗囂山寬而田狹俗囂故易以譟田狹故易以饑侯未至以爲難將至以爲憂乃七月下車膏雨霑流嘉氣紛集民聲大和四郊以寧侯悅莫喻所從來也百姓歌之曰我土颯颯黍稷芄芄孰啟我侯我神之功我氓蚩蚩牛犢熙熙孰相我侯我神之威侯驚召父老進而問故曰是何神也父老相率告於庭

曰州之東有廟曰嘉濟自秦漢以來血食至今我民司
命匪神其孰尸之侯恆然曰我何以得此於神哉抑神
實德我我其可不致力於神乃肅邊豆乃潔牲牲晨起
詣廟以謝以祈既竣事周視庭宇不遑於寧始建議營
度刊木於厓浮竹於津厥材既堅厥工維時植圮支仆
撤去庫陋傭力奔走咸勸於事堂室言言廊廡嚴嚴有
門秩然有亭翼然於是神位具宜廟制大備王公皇皇
袞冕衣裳祠既畢則以其餘修通達以便來遊者葺二
浮梁以利絕江者錢竒二百萬粟竒二百石悉出侯所
節縮故役易成而民不知明年四月侯除荆湖南路提
點刑獄未行粟米在市蠶麥滿野鷄犬相聞達於嶺表
迄侯去視始至如一日焉百姓復歌之曰奕奕廟貌我
侯新之侯爲我民匪神是私田有稻梁野無干戈微侯
之賜何以室家起舞僊僊伐鼓淵淵何以報侯萬有千
年予時卧山中州從事具本末來屬予書其事謹敘次
下方納諸廟門爲記

張尚瑗曰文山集有嘉濟廟記不言江東亦不稱石
固自舊志有宋濂撰江東廟記神名與廟貌灼然不
易然細繹記文詞語蕪陋序次龐雜所陳顯應之蹟
多里巷細人情事必非文憲公手筆攷之宋學士集
原無此文其爲僞撰可知按神姓名石固贛郡多山
故以石爲義猶水帝之號元冥火帝之號祝融也固

之義因石而起周禮掌固此其解也雩都有固石洞
會昌有盤固山興國爲平固縣贛壤以固爲名者不
一而足記稱傅元譏絲辭百章即今之江東籤占也
康衙官立化爲石祀爲配神當即康公祠之所託始
吳楊溥署爲昭靈王宋世廟額嘉濟爾時里俗傳奉
君蒿赫赫固無怪其有此徐知證知諤爲金闕玉闕
真人國主子姓並班仙籍五季風俗矯誣相仍李後
主五龍硯宋高宗赭袍瑪瑙帶宜其永鎮廟門矣逮
今功令垂爲祀典愚固不恠其有是廟是神而竊恠
其附會增益諸說熒惑耳目夫山川之靈其守爲神
嘉濟之名亦如儲潭之曰廣濟空山之曰潛靈必增

飾之則鑿矣因文憲一記莫辯其謠遂相沿益甚香
山詩豈獨賢者嗤仍傳後代疑何獨江東祠爲然哉
廣濟廟在郡北二十里儲潭山麓相傳晉咸和二年丁亥
郡守朱瑋提兵討蘇峻次儲潭夜夢神人告曰我爲儲
君奉帝命司此土府君能爲廟祀我當有以報瑋如其
請乃行果克敵而返遂立廟唐大歷三年戊申州守裴
諤祈雨感應有頌碑尚存宋熙寧三年庚戌觀察徐億
檄知軍周延雋新之信豐縣令黃慶基記紹興中賜今
額有司春秋致祭元至元三十一年甲午州守常硃修
至順二年辛未溫德盛重葺劉泰記明洪武十五年壬
戌興國儒士呂理募修知縣陸賢記 國朝康熙二十

一年壬戌諸生李復珖倡修知縣劉瀚芳記

黃記畧云章貢二水合流迤北匯為諸潭傍有廟曰
君之廟攷圖志云晉咸和中刺史朱瑋所立也蓋贛水
險聞於天下凡廣閩粵與夫四方往來無遠邇之人舳
舳銜尾道出祠下願脫奔湍悍激之險祈無觸石漂溺
之患者牲酒俎豆奔走盈庭值歲方旱里社畢集祀未
旋踵甘雨隨至然廟不葺且久觀察徐公行部過之嗟
其隳壞亟圖修復乃移檄於州守周公命梓度材以舊
址濱於沮洳稍斥廣其北隅財出於公民不服役州之
人與往來者觀靈宇之邃瞻像貌之嚴凜然肅恭莫敢
怠侮工既訖功信豐縣令黃慶基適以邑事走府下太

守顧語而使書其歲月焉 劉記畧云豫章自庾嶺而
下山勢蜿蜒如龍章貢二水夾之至贛而合一名瀨水
北流二十里是為儲潭潭深不可意計羣峰環拱舊有
廣濟廟晉刺史討蘇峻還建立以祀儲君君之云者非
有姓名籍貫謚號官爵傳於人間蓋山川之靈厥有所
司猶夫山之武彞河之馮彞同稱為君云爾已未冬予
承乏茲土纔入境見夫恠石嶙峋長河如瀉不啻高屋
之建瓴予指水以盟期與斯民更始不崇朝而抵潭之
下展謁神像肅然起敬而棟折榱崩又未嘗不喟然興
嘆也屬有師徒之擾奔走不遑而李生復珖乘間為予
言曰贛之邀惠於山靈者夥矣廟貌不修曷以云報予

曰得毋時絀而舉羸乎雖然生之意則厚矣於是倡議
醵金修葺并出所積香資一舉而新之而此邦之鄉大
夫暨都人士與夫四方羈旅行邁之人無不傾筐倒庋
以助成之匝歲之間鳩工庀材陶甃礮石金碧輝煌丹
雘聿新予適有事至其地瞻禮甫畢衆求予言以記之
予不獲辭因書之以勒石

國朝程可則儲潭廟詩云古廟依孤嶼靈潭控上游雲
霞藏洞壑歲月老松楸四壁龍蛇氣中天鳥雀愁翁河
今有頌何必戒沉牛 顧嗣立泊儲潭廟詩云儲山轉
蒼翠儲水一泓清茶戶烟中語秧田雨後耕雙江明夕
照孤塔倚春城宴坐且爲樂風灘浪已平

贛州府志

卷十三

贛縣廟祀

四

潛靈廟在縣治南去崆峒二十里噴龍石之麓晉咸康五
年己亥郡守庾恪建初爲空山祠祈雨輒應宋賜今額
紹興中郡掾名盛有記失其姓明永樂中重修勅封廣潤
侯勒二牌於廟前今遇旱則禱屢著靈應

盛記云贛州地控南徼其山鎮曰空山奠州之陽銳鋒
干霄攬焉如揭旌纛巘嶸林麓舒布環百餘里脈絡纏
聯章貢二水夾以北馳瀾漫竦涌如波濤合流鍵之其
勢乃始扶輿磅礴高閎顯敞州治正據與山拱揖蓋陰
陽所謂來勢者山能蓄洩雷雨雲霏闔散則神物依憑
爲一郡千里利澤宜也謹按漢郡國志及唐十道志州
舊記言空山出空青故曰崆山又曰良材果實一郡所

資雖名空山所產則倍又曰山上有平湖中有扁艚底人動者風雨立至神舟之驗今不可攷然山有噴龍石穴蓋利澤千里神蹟之殊尤傑特者也自南門走信豐道四十里至龍下鋪自龍下鋪升山十里而至望州嶺下山又十餘里而至平康里山間居民櫛比水土衍沃宜五種多異材人不識早歲清谿之外又十餘里水口石峰夾峙下臨萬仞溪流迸落半崖爲飛瀑聲砢礫如怒雷瀦爲石泓方廣倍尋炎夏寒慄可畏人跡罕至即噴龍穴也山上有神祠即紹興十七年歲旱禱雨有獲郡邑爲奏績賜額潛靈者也若驕陽爲沴官民潔告於祠洵水石泓遇水族出現迎取崇奉必得甘澍否則無

應率以爲常歲在己卯五月壬午夏至大風揚沙石俚占爲旱已而不雨六十餘日今太守直閣陳公始至雩祭甚肅撤膳去樂並走羣望復不雨盛因博詢邦人有龍湫可禱者僉以噴龍之靈告盛具稟公公輒屬有司備迎請之禮唯謹且命盛將事盛既得檄齋祓謁款務極其至前此官吏有禱多憚欽崖之險躬告神祠恐從徒下山致神褻慢囂謹休應多邈盛既至詰旦告祠以祝史燔薌幣訖肅徒捫蘿躡蹻造石穴以祝史燔薌幣申禱如告祠時頃臍蠻未格盛因祝曰倘辱神賜當奏封爵崇廟貌勒石紀績不敢後久之有蜥蜴蜿蜒而浮水上衆喜曰神龍至矣乃奉以旋陟崖度嶺炎曦煜

瀾雨候殊遠出山雲霏倏起雷雨大至蓋神與未造城
闈環境百里已霑零矣時已七月稻田洽瀋晚稼實賴
以濟歲不大穀其年冬郡具以聞漕臺漕臺保奏朝廷
下太常論爲應式今年三月乙未勅賜廣潤侯會再闕
兩命書適至盛復往且以命書告應答如一神輿往返
皆滂潤導送邦閭耆穉呼忭相屬蓋非名作鎮不足以
奠神明非神明不足以布惠澤而非公之誠不能以格
神致豐歲爲贛二年政成民和百廢具舉天子用練臣
論賜璽書特加實儲再任益懋試可而宸綸寵綏復被
於神則其所以詣幽明召和氣至矣盛脩員郡椽稟命
將事既獲嘉應敢虛神貺因請以公帑斥祠宇崇像設

贛州府志

卷十三

贛縣廟祀

四二

工既竣事即勒之碑揭文侈先烈後刻迎送神二章畀
邦人歌之用贊時祀其詩曰山之崇兮環環水之瀉兮
潺潺神之宅兮何在差杳邈兮山水之間若芳攜兮搢
蕙湘以潔誠兮肅正饋旂芙蓉兮柱車履正良兮導夫
神以卽涂神之來兮適爾雲霏起兮舒舒願神休兮溢
我馨萬彙兮昭蘇神之來兮山出雲沛甘雨兮惠邦人
神之去兮風肅肅惠邦人兮殖嘉穀吹笙兮擊鼓呻歌
兮繹舞神德兮無極人心兮依怙山有嘉木兮水有蘭
兮具詞歲表神庥兮垂萬禩而弗刊

靈山廟在縣治北舊爲陸氏居後唐應順間陸平遠過異

人言其宅當爲神宇。是捨宅爲之前有雙榕樹枝葉交蔭外爲橋後罹兵火重構崇飾有加明洪武中平遠裔孫監察御史陸載請同官陳仲述記兄仲行修葺事正統九年甲子通判鄭暹修成化四年戊子知府曹凱修萬歷十七年己丑都御史秦燿修

仲述記云贛郡城東北有靈山廟凡大札大災禴禳祠禱焉以神司善惡之應也廟創於後唐應順間迄今四百餘年民祀神如祀其先地本贛陸氏所居故址有陸平遠者雅誦道家書雖寢食弗輟有異人造焉善相其地之宜謂其居弗利因爲厭之迺搏土肖像以遺俾祀焉授以神水愈厲疾因忽不見由是靈異日著周顯德

中祠增創崇麗若帝者居陸氏子孫甚夥世掌祠祀弗替歲時則合其族以展時事以盡敦睦之道祠宇或遭兵燹頽圯陸氏暨贛人先營之不敢後祀事載麗牲石歷歷可攷洪武乙丑平遠之裔孫陸仲車氏以進士拜監察御史與余同寮道其事頗悉謂贛人事神且久至我朝始登祀典歲則官致牲幣行禮祠下益敬以虔民心翕然嚮仰祠宇之撓蠹低壓族之良者復鳩衆力完舊而圖新之殿堂門廡黝堊丹漆光溢人目而未有記宜書於石俾來者罔敢墜厥緒既而其兄仲行又以狀來請余辭不可祭法曰聖王之制祭祀也能禦大菑則祀之能捍大患則祀之神非能禦菑捍患乎不然民之

敬神何若是其至也况善惡之報神實司之豈徒疾病
行禱而已所以陰翊王度潛淑人心於不言之表尤非
細故則神之載祀典非苟然矣嗚呼天典民彝既壞人
心之存或因於神譬有人焉行如盜跖衣裳冠冕所不
能化刀鋸鈇鉞所不能怵父兄師友所不能導一旦過
祠則俛首喪氣蕭然如不勝衣若神之臨乎其上行
不敢爲非義者有之故曰明則有禮樂幽則有鬼神理
豈二乎哉誠使贛人因事神以敬敬畏鄉有父老率先
子弟修其操履行誼質諸鬼神而無愧神之聽之將福
之佑之不暇况有大札大裁之禱乎此朝廷祀神治民
之典所以錫福於贛人者在是陸氏世世子孫沐神之

贛州府志

卷十三

贛縣廟祀

四四

既亦寧有已哉廼作迎享送神之典俾歌以祀焉辭曰
陳瑤席兮湛清醑續紛紛兮靈起塗風爲馬兮雲爲車
胡之弓兮秦之盧繡衣濯濯兮龍文裾流蘇高張兮紅
氍毹戈干生火兮神兵趨傀形殊貌兮聲魏魏倏而來
兮忽而徂佑我民兮矢弗渝梗神化兮神所屠羗好修
兮神所譽我民報祀兮無怠厥初

太尉廟在壽量寺前宋建祀都統制勅封忠烈太尉陳敏
歷又有廟在章水鄉下釜金龍山別祀唐雷萬春
忠通廟祀宋陳百嘉福建長樂人紹興間流賊犯虔吉有
捍禦功賜廟於州今廢

文昌祠二一在舊縣學左知縣曹炯曾修復一在金魚池

今爲民居

陽王巖祠在通天巖宋時立明憲使趙元復重建塑孝本像於中嘉靖中知府羅輅改祠巖下久廢今安像於巖洞宋時有闕名遊玉巖記

記云嘉定癸丑秋將從事於萸菊郡守清源留公正約憲使古汴趙公以野服籃輿訪陽隱君祠於通天巖下先二日清源公以規畫授吏度寺東偏立表於梅取基於茅絢茅屋巢甃室幕結爲草亭以便觴酌時有客自閩中來公命載之後車晴光豁天秀色蔭晦旌旗蔽林巒鼓吹振山谷既至後車之士起白於清源公曰昔也蕪斯人不我期今也亭斯人將吾疑蓋公以赤子龍蛇

贛州府志

卷十三

贛縣廟祀

四五

帖服羣盜外修城觀內作軍門式序程功咸建永績於是飾翠玉改合江創雪亭卜煙林寄逸興而遐思賦招隱以凝睇况乎薦駕幽棲開跡竒秘倏焉命賞幻化若神樂則樂矣風雨弗支歲月亟圯獨不能留跡物外以慰邦人行樂之思乎言合公志亟命改築取昔人所贈隱君詩匾曰玉巖嗟夫是山皆巖也惟通天著於圖經不知玉巖復奚指也其以比德耶隱君不作名實不辨而通天一竅歲久堙塞里俗相傳謂雷爲變然煥發山靈追復舊觀不獨在斯築也二公政事文學取重鬼神邂逅荒陬覽勝弔古安知其不遂駐豐隆叱六丁使巖竅復通於天平若夫紹玉巖遺躅以無忘二公之賜則

予也不敢多遜是日既相與賦詩因爲之記以告來者
其年九月望日記

宋陳天麟題玉巖詩云倚巖一線猿猱路隔水幾家桑
柘村巖谷淺深隨步去樓臺遠近帶雲昏不辭窺竇壺
天近稍覺鈎簾日景暄大字摩挲刊石在隱君名姓與
山存 清幽共說玉巖好登眺偶逢官務休喝道應迴
松下卒看棋閒傍石邊樓禪僧進佛知無日田父營生
喜有秋吟咏未幾歸馬去明朝摩石記曾遊 鄭蘊次
韻云亂山環遶疑無路却望人家嶺上村古寺性耽泉
石好孤城不見水煙昏早行攜杖雪初起夜誦挑燈景
尚暄遙問隱君何處是滿巖松竹至今存 世路從來

踈散甚江山好處且歸休飯餘正好遠尋景暮罷何妨
閒倚樓嶺外梅踈初破臘巖前松老不知秋晚風落日
催歸興更約閒時取次遊 闕名次韻云金鞍跨馬曉
霜繁下馬來尋煙際村修竹飛凰煙渺渺高樓凝蜃日
昏昏雲容似斷根還續風色雖寒各自暄問記玉巖書
繞屋只今猶有幾編存 一官壁水豈能留萬卷書窻
未肯休稍喜梅花橫月觀重傾桑落駐晴樓皇華使客
將壺矢俊逸叅軍妙奕秋清獻濂溪各千載路人還惜
昔時遊 黃登詩云占斷煙霞老一邱玉巖閱歷幾春
秋削成四壁開三面比似他山出一頭幾欲登臨窮勝
槩偶緣休沐得佳遊醉磨濃墨書巖石恨不攜琴更少

留 飄然投綬卧雲林一片平生鐵石心不是遺文能
動我誰令弔古更沾襟身同逝水幾寒暑名在空山無
古今仰止高風拜牀下還教三歎薄朝簪 陳宗禮詩
云山蹊屈曲石玲瓏今古遊人興不窮一一圓明人不
識却尋石隙任中通 翠屏青案互高低清淨仙人薜
荔衣正好觀心坐巖下忘歸却是不忘歸 胡榘詩云
陽翁故隱尚依然鬱鬱松筠鎖翠煙一世辛勤躬秉耒
可憐種玉不逢年 元陳謹詩云預作重陽半日遊行
厨望客屬鰲頭樽前綠橘當時菓嶺下清泉澈夜流新
竹未斑秋正好晚禾纔熟歲仍收使君須盡登臨興行
捧天書未許留 同向天巖最上遊詩翁來見九螭頭

贛州府志

卷十三

贛縣廟祀

四七

僧房爲映川原好野水空隨歲月流玉節朝天行日促
金風驅雨暮雲收已摹大字鐫山骨要與匡廬萬古留
謝桓愨公祠在棉布街鳳凰池上祀明布政謝詔春秋有
司致祭今爲山陝會館

周益公祠在壽量寺內祀宋周必大今廢

崔邑侯祠在白家嶺祀明知縣崔天錫今廢

李邑侯祠在西街祀明知縣李素今廢

楊邑侯祠在縣治左祀明知縣楊汝昇今廢移像於縣城

隍廟

陳邑侯祠在舊縣學前祀明知縣陳履忠今廢

贛州府志卷十三